

COMUNICATO n. 1048 del 21/04/2026

Gerosa: “Di èkomusee echtege sealn von ünsarn lentar auzohalta un zo sterchra”

Èkomusee: ågenump dar auzschraibung vor prodjèkte vor di djar 2026/2027

[Cimbro] Da provintziàl DJunta, vorgelekk vodar Asesören vor di kultùr Francesca Gerosa, hatt ågenump in näüge auzschraibung auzohalta kulturàl prodjèkte von èkomusee darkhennt vodar autonome Provìntz vo Tria vorz djar 2026.

“Ånemmente disan auzschraibung vorz djar 2026 bõlbar machan gian vürsnen un stercharn a realtét, da sèll von èkomusee, boda zoaget da echte seal von ünsarn lentar – hatta khött di Gerosa – di èkomusee soìn nèt lai hüatar von gedenkh, ma djüste labör boda machan vürgian di lentar boda ’z gebizza trèfft di umbèlt un di vornaügarung. Untarleng afte kultùr billz bölln soìn genuant gloam in an modo zo kreschra boda åheft vo untar, von lem bvo alle tage, guat zo bèksla di tradiztionen un di identitét von lentar in konkrètege oportunitét zo geba näügez lem vor di djar boda khemmen. Ünsar zil iz auhalt n un stercharn disa nèt, zoa azta dar kulturàl schatz saibe hèrta eppaz guatz vor alle un an motor boda schupft zuar a sotziàl pintom in anigalz tal von Trentino”.

Disa inìtziatìf steat drinn in sèll boda auzmacht daz provintziàl gesetz n. 15 von 3 von bimmat 2007 boda darkhennt di èkomusee azpe grüntliche strumèntn zo macha vürgian üsarne lentar. Dise realtét, augehaltet un vürgevüart von lânt Emtar hãm an bichtegen ruòl zo darhalta un zo geba vèrt dar stòrdja, dar kultùr un dar pintom bodada iz zbisnen dar umbèlt no in gântz un di lentar gelebet, legante panàndar di kulturàln politike pinn sèllnen boda ågian dar umbèlt, dar ekonomì un dar nàsüach.

Dar auzschraibung hatt drau in gântzan 240.000,00 euro. Ditzta gèlt, boda sa iz gest hintargehaltet pittnarn pellarn delibera von lèntz von 2026, bart soìn inngetoalt in zboa djar zo maga machan verte di prodjèkte inngètt:

- 144.000,00 euro vorz djar 2026.
- 96.000,00 vorz djar 2027.

Darzuar in kritèrie von auzschraibung dar provedimènt hatt ågenump di formulér bodada soìn mångl innzogebe di vorsch, in akonto un dena z’soina auzgezalt verte. Alle di briavan, dar auzschraibung un di formulér bartn mang khemmen abegenump tra bintsche zait afte istituzionàl websait vodar autonome Provìntz vo Tria.

Übarsetzt von Schaltarle vor di zung von Toalkamou vodar Zimbar Hoachebene

(cdt)